

Registered at the G.P.O. as a Newspaper.

TE TOA TAKITINI.

Te Utu mo te Pepa 10/- i te tau.

Me penei nga reta "Te Toa Takitini," Box 300, Hastings.

660

TE TOA TAKITINI

Oketopa, 1927

TE ROPU TIROTIRO I NGĀ IWI O TE MOANA- NUI-A-KIWA.

(INSTITUTE OF PACIFIC RELATIONS.)

Numa 2.

Na PROFESSOR CONDLIFFE.

Kia pai kia marama te korero i ngā whakamarama a te tohunga nei a Professor Condliffe. He kai-whakaako tenei no ngā tamariki e whai nei i ngā taitara o ngā kura nunui. He korero tino hohonu enei, he tohutohu e tika ana hei whakarongo ma tatou. Na enei momo tangata i whakapiki te mohiotanga, te honore, me te mana o te Ingarihi.

He mea tino whakamiharo na ngā iwi nunui o te ao te ahua o te neho pai a te iwi Maori me te iwi pakeha i enei montere. No enei wa tata ka huri ake nei i rongo ai ahau i etahi korero whakamihari mo te tatou noho pai. Tera tetahi manuhiri tuarangi no Amerika i tae mai ki te tatou taminiona, a naku i arahi haere puta noa ngā rohe o te tatou taminiona. He tangata tenei kua kyangia ki ngā ahuatanga o ia iwi o ia iwi o te ao, a kua kite i ngā raruraru e tipu ake ana i waenganui i ngā iwi ke, e noho tahi ana. I roto i ngā iwi o te ao, kaore rawa ia i kite i tenei ahuatanga o te noho pai, penei me te Maori raua ko te pakeha e noho tahi nei, e kotahi nei, te whakaaro me ngā mahi.

Tekau mā rima ana tau e noho ana i te whenua o te Tiapani, i muri iho ka whakaturia ia hei kai-whakahaere mo te Ropu tiro-tiro i ngā iwi (Race Relations Survey) i te taha ki te Moana-nui-a-Kiwa o Amerika. Ko te wahi tenei e noho kino nei te Merikana raua ko te Tiapani. Ko tana mahi i reira he rapu i ngā kaupapa i noho kino ai enei iwi, he tatau i te tokomaha o ngā Tiapani, me ngā Hainamana e noho ana i Kariwhonia (California), he aha a ratou mahi, he aha ngā kino e whakapangia ana e ratou ki ngā Merikana, he aha ngā putake i noho kino ai ngā iwi o tera wahi. I te pai o ngā hua i kitea o ngā mahi a taua tangata, Mr J. Merle Davis, whakaturia ana ia hei kai-whakahaere mo te Ropu tiro-tiro i ngā iwi o Te Moana-nui-a-Kiwa, (Institute of Pacific Relations). He ropu tenei i whakaturia hei tiro-tiro i ngā putake i raruraru ai te noho tahi o ngā iwi o te Rauhititi, me te Hauauru.